

1264-1264- OFP - Acta Capitulum Generalium Parisius Celebrati

In nomine patris et filii et spiritus sancti. Amen.

Acta capituli generalis Parisius celebrati
anno Domini · M^o · CC^o · LXIII^o ·

Confirmamus has constitutiones. In rubrica de cena domini. ubi dicitur. vadat conventus ad refectorium. deleatur totum. usque in finem tocius rubrice. et dicatur sic. vadat conventus ad chorum. iunioribus precedentibus. et collocatis ante pulpitem ibi a sacrista preparatum. candelabris et thuribulo. sicut fuerunt in capitulo collocata. sedente subdiacono cum ministris. post dyaconum. in aliqua sede ibidem a sacrista preparata. dyaconus stans ante pulpitem ceteris fratribus residentibus. prosequatur quod de sermone dominico restat. finito autem sermone sine. tu autem. et prelato signum faciente. surgant omnes. et dicente prelato. versum. adiutorium nostrum. etc. ; subdiaconus cum ministris accipiant que ad eos pertinent. et eo ordine quo venerunt; ad sacristiam revertantur. et postmodum fiat collatio tempore suo. more solito. Et hec habet · iii · capitula.

Item hanc. In capitulo de capitulo provinciali. in fine dicatur sic. prior autem provincialis et diffinitores. in quolibet capitulo provinciali. determinent tempus. ante quod fratres; ad sequens capitulum non veniant. Et hec habet · iii · capitula.

Item hanc. In capitulo de sollempni celebratione capituli. ubi dicitur. deinde culpe audiantur. addatur. si qui vero sine licencia. ad capitulum generale vel provinciale venerint. primo culpe eorum audiantur. et recepta penitentia; a capitulo excludantur. Et hec habet · iii · capitula.

Item hanc. In capitulo de silencio. ubi dicitur. absque dispensacione. removeatur et dicatur sic. in uno prandio aquam bibat. et in capitulo unam disciplinam coram omnibus recipiat. exceptis infirmis decumbentibus. et in hoc non dispensetur nisi per magistrum ordinis. vel priorem provincialem. et hoc raro. et ex rationabili causa. Et hec habet · iii · capitula.

Item hanc. In eodem capitulo. ubi dicitur. cum contigerit nos cum eis comedere. prior tamen provincialis uni de comedentibus secum poterit dare licenciam loquendi. Et hec habet · iii · capitula.

Item hanc. In capitulo de recipiendis. ubi dicitur. de consensu conventus. removeatur et dicatur sic. nisi de consensu prioris. et duarum partium fratrum. qui sunt de conventu ubi fuerit induendus. Et hec habet · iii · capitula.

Approbamus has. In capitulo de recipiendis. ubi dicitur. ubi fuerit induendus. removeatur. ubi. et dicatur. pro quo fuerit induendus. Et hec habet · ii · capitula.

Item hanc. Quod fiat festum trium lectionum de beato Eduardo. et magister ordinis provideat de officio et de die. Et hec habet · ii · capitula.

Inchoamus has. In capitulo de suffragiis. post illud. post festum sancti Dionysii est faciendum. addatur. anniversarium vero omnium sepulorum in cimiteriis nostris. ubique fiat prima die vacante post octavas apostolorum Petri et Pauli.

Item hanc. In capitulo de graviori culpa. ubi dicitur. ipsum possit proclamare. addatur. si quis autem de mala familiaritate notabiliter suspectus fuerit. et post monicionem a prelato de consilio discretorum fratrum coram eis pluries sibi factam. se non correxisset fuerit deprehensus. priori provinciali. et diffinitoribus sequentis capituli. denunciatur. ut ipsi provideant ordinis honestati.

Item hanc. In eodem capitulo. ubi dicitur. de crimine nisi possit probare. deleatur totum. et dicatur sic. vel etiam criminis auditu. nisi ipsum crimen possit probare.

Item. In eodem capitulo. in fine dicatur sic. si quis falso aliquem diffamaverit. non possit absolvi; nisi famam fratri restituat. apud illos; apud quos diffamavit.

Item hanc. In capitulo de sollempni celebratione capituli. in fine dicatur sic. capitulum autem generale. ultra sabbatum infra octavas pentecostes. non prolongetur. nisi ex causa rationabili; magistro et diffinitoribus videatur. quod per unam diem. vel duos dies ad plus debeat prolongari.

Item hanc. In capitulo de visitatoribus. ubi dicitur. secundum formam in electione diffinitorum. etc. usque ibi. vel plures. deleatur totum. et dicatur sic. a priore provinciali et diffinitoribus assignetur.

Item hanc. In capitulo de capitulo provinciali. ubi dicitur. et predicatorum generales. addatur. si qui tamen. qui non sunt de capitulo. in diffinitores eligantur. ad omnia acta eiusdem dumtaxat capituli admittantur.

Item hanc. In capitulo de electione prioris provincialis. ubi dicitur. eligatur. si tunc fuerit celebrandum addatur. quod si electores. vel alterum eorum impediri contigerit. antequam iter ad eandem electionem arripuerint. conventus alium vel alios possit eligere loco illorum qui fuerunt impediti. Idem dicimus de socio prioris conventualis euntis ad capitulum provinciale electo.

Item hanc. In capitulo de electione prioris conventualis. ubi dicitur. iuris subtilitatibus. etc. addatur. publicato autem scrutinio. et facta collacione numeri ad numerum. si minor pars maiori consenserit. ille qui primam vocem in electione habuit; surgens dicat. ego talis vice mea. et omnium electorum presencium.

eligo talem. N. in priorem talis conventus. vel talis provincie. si prior provincialis eligatur. Si vero non omnes consenserint. sed maior pars. tunc sicut prius qui primam vocem habuit. dicat. ego talis pro me. et pro illis qui mecum consentiunt; eligo talem. N. etc. sicut prius.

Item hanc. In capitulo de electione magistri. ubi dicitur. teneantur quam cicius intimare. addatur. ut provincie · xii · possint ad electionem electorum procedere. et ad hoc provinciale capitulum convocare. eciam si provinciale capitulum in ipso anno fuerit celebra-tum. ita quod in sequenti capitulo magistri electio celebretur. si autem post festum. etc.

Item. In ordinario in rubrica de festo beati Petri. in fine dicatur sic. fiat eciam cotidie memoria usque ad octavum diem. in matutinis. per antiphonam. Petrus novus. in vesperis per antiphonam. ad sancti Petri.

Item. De beato Gregorio fiat festum semiduplex.

Iste sunt admoniciones.

Priores provinciales cum diffinitoribus in singulis provinciis. in quibus non est certus modus ordinatus providendi studentibus. ordinent in instantibus capitulis provincialibus. certum modum huiusmodi provisionis. et modum quem ordinarint. vel hactenus habuerint. significant proximo capitulo generali.

Item. Inhibemus districte fratribus universis. ne faciant aliquas inductiones. in electionibus faciendis. qui vero de cetero fecisse contra fuerint deprehensi; priventur per triennium voce in omni electione.

Item. Nulla vestis scindatur. vel fiat fratri. nisi prius per examinatores ad hoc statutos iudicetur. quod pannus de quo fienda est vestis; sit competens ordinis paupertati.

Item. Caveant priores provinciales. ne conventibus priore carentibus. aliquem fratrem qui non sit de illo conventu offerant eligibilem. nisi prius ab illo conventu fuerint requisiti.

Item. Caveant diligentissime. ne aliquis frater vadat ad curiam. sine licencia magistri. qui autem de licencia ipsius venerint; vadant pedites. et secundum formam ordinis. et litteras secum deferant. tam licenciam quam negocia pro quibus vadunt; plenarie continentes.

Item. Quicumque fratres equitaverint. vel currisaverint. secundum quantitatem culpe gravius puniantur. et visitatores excessus circa huiusmodi notabiles; nuncient magistro et capitulo generali.

Item. Fratres. qui miserunt literas vel memorialia non ostensa prelato suo. vel sibi missa aperuerunt. nisi prius licencia habita; acrius puniantur.

Item. Priores. seu vices eorum gerentes. qui amodo acceperint pro conventu mutuo pecuniam. que in libris debet expendi. de libris et scriptis sibi deputatis; huiusmodi mutuum solvere teneantur. priores autem provinciales. et visitatores. apponant curam. qualiter huiusmodi pecunia persolvatur.

Item. Iniungimus districte omnibus tam subditis. quam prelatis. ut quicumque dant operam. consilium. vel auctoritatem. quod aliquis ad magisterium in theologia Parisius promoveatur. quod consideratis moribus. et sciencia. et gracia docendi. illum semper proponant de toto ordine. absque acceptione nacionis. et persone. de cuius promocione credent. quod magis cedere debeat ad dei gloriam; et utilitatem ordinis et honorem.

Item. Nulli fratri liceat ire ad magistrum vel prior-em provincialem sine licencia prelati sui. et volumus. ut qui contrafecerit; graviter puniatur.

Item. Mandat magister ordinis prioribus provincialibus et diffinitoribus capitulorum provincialium universis. quod in singulis annis. quamdiu ipse erit in officio; mittant ei ad capitulum generale acta capitulorum provincialium.

Item. Priores provinciales habeant curam. quod predicetur pueris in scholis. et confessiones eorum. si ipsi confiteri voluerint; audiantur. et predicantibus dictis pueris; fiat copia de libello. qui est compilatus de huiusmodi predicacione.

Item. Quilibet prior provincialis solvat · l · solidos Turonenses ad solvenda debita procuratoris in curia. de quibus eciam solvantur debita prioris Florentini. que contraxit. cum esset in curia procurator.

Item. Committimus magistro ordinis. ut ipse de studio Parisiensi. diligenter ordinet. et disponat in omnibus prout generali utilitati ordinis viderit expedire.

Absolvimus priores provinciales Ungarie. Polonie. et Grecie.

Ista sunt suffragia.

Pro domino papa et cardinalibus. et statu tocus ecclesie. etc.

Pro fratre Hymberto. quondam magistro ordinis. et pro fratribus qui secum laboraverunt in officiis ordinis. et pro attinentibus sibi secundum carnem; quilibet sacerdos · i · missam.

Concedimus · ii · domos in provincia Hispanie.

Item · ii · in provincia Theutonie.

Item · i · provincie Dacie.

Capitulum generale sequens assignamus in provincia Provincie in Montepessulano.

Actis additae sunt litterae magistri ordinis.

